

Inatsisartunut nutaamik qinersinissaq pillugu Inatsisartut inatsisaat

Inatsisartunut qinersinissamik suaaruteqarneq

§ 1. Inatsisartunut qinersisoqassaaq ulloq 11. marts 2025.

§ 2. § 1-ip malitsigisaanik taamatut avaqqussinikkut Inatsisartunut qinersinissaq pillugu Inatsisartut inatsisaat naapertorlugu naammassineqassaaq, takuuk imm. 2.

Imm 2. Inatsisartunut qinersineq pillugu Inatsisartut Inatsisaani § 12 imm. 3 malillugu partiit nutaat Qinersinermut ataatsimiititaliamut nalunaartussaananerannut killiussaq allannguuteqarpoq imaallilluni, nalunaartussaataaneq qinersinerup ullua sapaatip akunnerik sisamanik sioqqullugu tunniussisoqassalluni.

Suliniutit nunanut allanut tunngasut il. il.

§ 3. Inatsisartut Naalakkersuisullu pillugit Inatsisartut inatsisaanni § 29-mi tunngavissat tunngavigalugit, Naalakkersuisuugallartut, ikinnerpaamik partiit siulittaasuinit pingasunit akuerineqarlutik, Inatsisartuni ilaasortat ikinnerpaamik 2/3-iinik sinniisoqarlutik, piffissaq Naalakkersuisutut atuuffiat atuukkunnaareerpat makkununga suliarinnissinnaanissamut pisinnaatinneqarput:

- 1) Nunap naalagaafflluunniit nunani allani naalakkersuinikkut imaluunniit aningaasaqarnikkut soqutigisai, tamakkununga ilanngullugit Kunngaqarfik Danmarkimut ataqateqarneq, naalagaaffinnut allanut pissaanilinnut imaluunniit naalagaaffiit assigiinngitsut soqutigisaannut tunngasut eqqarsaatigalugit isumaqatiginninniarnissamut kinguartinneqarsinnaanngitsumut pisinnaatitsissutip akuerineqarnera.
- 2) Pisinnaatitsissut aalajangersakkami matumani nr. 1-imi matumani pineqartoq naapertorlugu isumaqatiginninniarnierit kinguartinneqarsinnaanngitsut suliarineqartarnissaat.
- 3) Pisinnaatitsissut aalajangersakkami matumani nr. 1-imi pineqartoq naapertorlugu isumaqatiginninniarnierit kinguartinneqarsinnaanngitsut naammassinissaat, Kalaallit Nunaanni Namminersorneq pillugu inatsimmi Kapitali 4-mi pineqartunik inatsisit inuiannut tamanut tunngasut pillugit inaarutaasumik isumaqatigiissusiortoqarneranik kinguneqartinnagit.

Sanaartornissamut suliniutit pillugit isumaqatigiissusiornerit suliarinnittussarsiornerillu pillugit suliniutit

§ 4. Inatsisartut Naalakkersuisullu pillugit Inatsisartut inatsisaanni § 29-mi tunngavissat tunngavigalugit, Naalakkersuisuugallartut, ikinnerpaamik partiit siulittaasuinit pingasunit akuerineqarlutik, Inatsisartuni

ilaasortat ikinnerpaamik 2/3-iinik sinniisoqarlutik, sanaartornissamut suliniutinut pilersaarusalugit naammasseriikkanut 2025-mullu Aningaasaqarnermut Inatsimmi pisariaqartinneqartunik aningaasanik immikkoortitsivigineqareersimasunut suliarinnittussarsiornissamut isumaqatigiissusiornissamullu pisinnaatinneqarput, taamatut pisoqanngippat inuiaqatigiinnut ajoqutaasinnaappat, matumani ilanngullugit nunatta karsianut suleqatigisamulluunniit namminersortumut aningaasaqarnikkut kingunerluuteqassappat, imaluunniit suliffissaaleqinerutitsissappat sanaartornissamulluunniit suliniutinik kinguaattoortitsissappat.

§ 5. Inatsisartut inatsisaat unaa nalunaarutigineqareernerata aqaguani atulersinneqassaaq.

Namminersorlutik Oqartussat, ulloq 4. februar 2025

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut